

14. august 2026

UKA 2026/260

Inatsisartut ingerlatsinermut maleruagassaanni § 33 malillugu matumuuna una isummerfigisassatut siunnersuutigineqarpoq:

Inatsisartut aalajangiiffigisassaattut siunnersuut, Naalakkersuisut peqquneqassasoq nalunaarusioqqullugit, utoqqaat inatsisitigut illersorneqarnerat, paaqqineqarnerat ataqqinassusaasalu qanoq annertusarneqarsinnaanersut. Nalunaarusiornermi pitsanngorsaatissatut siunnersuutitut tigussaasunut aningaasatigut allaffissornikkullu kingunissai nalilersorneqassapput. Nalunaarusiaq Inatsisartunut agguanneqassaaq UPA 2027 nallertinnagu.

(Inatsisartunut ilaasortaq Margrethe Thårup Andersen, Demokraatit)

Tunngavilersuut

Utoqqartagut inuunerminni sivisuumi inuiaqatigiinnut ilusilersueqataasimapput.

Sulisimapput, meeqqanik perorsaasimapput, ilaqutariinnik ilusilersuisimapput, najugaqarfitsik unittoortinnaveersaarsimavaat aammalu ullumikkut nunagisatsinni suleqataasimallutik. Utoqqaat nanertuutaanngillat. Inuupput, toqqissisimasariaqartut ataqqisariallillu.

Demokraatit isumaqarput, ileqqorissaarnermut politikkikkullu pisussaaffeqartugut, innuttaasut utoqqaat ikiorneqarnissamik, paaqqutarineqarnissamik tapersersorneqarnissamillu pisinnaatitaaffiisa qulakkiissallugit.

Utoqqaat oqaaseqartartuata 2025-imut nalunaarusiaata takutippaa, utoqqarnut tunngatillugu suli unamminartorpassuaqartoq. Nalunaarusiami ilaatigut paaqqutarineqarnerup isumassorneqarnerullu naammannginnerisa ajornartorsiutaanerat tikkuartorneqarput, inatsisitigut illersorneqannginnerat, pisortanit sullinneqarnerup naammannginnera, puigortunngornerup iluamik paasisitsiniutaannginnera, ineqarniarnikkut ajornartorsiutit aammalu illoqarfiit nunaqarfiillu akornanni sullinneqarnerup assigiinnginnerujussua. Utoqqaat oqaaseqartartuannut saaffiginnissutit amerlassusaat 2024-imi 118-iniit 2025-imut 148-inut qaffassimapput, nalunaarusiamilu nalilerneqarpoq, ajornartorsiutit ataasiakkaaginnaanngitsut, ilusilersugaanermiilli ajornartorsiutineersuusut¹.

Ilumoorinnaanngilaq, utoqqaat qanigisaallu aaqqissuussaanermut akersuuttuaannavinnissaat, ikiorneqarnissaminnut pisariaqartitaminnut ikiorneqarumallutik. Utoqqaq angerlarsimaffimmi ikiorteqarnissamik, isumassorneqarnissamik, puigortunngorluni tapersersorneqarnissamik,

¹ Utoqqaat pillugit oqaaseqartartoq 2025-mi UKIMOORTUMIK NALUNAARUT



DEMOKRAATIT

ikiuutaasinnaasunik pisariaqartitsippat, tulluuttumik ineqarnissaminik imaluunniit ersarissumik oqartussaniit aalajangiivigineqarnissaminik pisariaqartitsippat, ersarissumik, akisussaassusilimik paasinartumillu akissuteqartoqassaaq. Minnerunngitsumik utoqqaat atugarliornerpaat pineqartillugit, namminneerlutik naammagittaalliornissaminut nukissaqanngitsut, paasiniaanissaminut imaluunniit pisinnaatitaaffimminnik malitsitsisoqarnissaannik piumasaqaateqarnissamut nukissaqartuaannanngitsunut.

Imaqarniliap aamma tikkuartorpaa utoqqaat illuisa nakkutigineqanngilluinnarlutilluunniit naammanngitsumik nakkutigineqarneri. Tamanna ilungersunarpoq. Nakkutilliineq piumasaqaataannaanngilaq. Sakkuuvoq qulakkeerumallugu, innuttaasut utoqqaat illersorneqarsinnaasumik najugaqarlutillu inuuneqartinneqarnerannut. Nakkutilliineq ingerlanneqarsimanngippat imaluunniit naammanngitsumik ingerlanneqarsimappat, sumiginnaanerup ingerlaannarnissaa angoriaannaavarput².

Taamaattumik Demokraatit isumaqarput, ataatsimut nalunaarusiornissaq pisariaqartoq, Inatsisartut politikkikkut ersarissumik tunngavilernissaannut utoqqaat atugaannik pitsanngorsaannisamut. Nalunaarusiaq ilaatigut ersarissaanermik imaqartariaqarpoq, qanoq utoqqaat inatsisitigut illersorneqarnerat nukittorsarneqarsinnaanersoq, qanoq kommunit utoqqaat illuinit nakkutilliinerat ingerlanersoq, qanoq angerlarsimaffinni ikiorteqarneq ullutsinnut tulluussarneqarsinnaanersoq, qanoq puigortunngortunut akisussaaffik ersarissarneqarsinnaanersoq, aammalu qanoq utoqqaat nunaqarfinni assigiimmik ikiorneqarlutillu tapersersorneqarnerisa qulakkeerneqarsinnaanerat.

Tassungalu ilutigalugu pingaartuuvoq, nalunaarusiami ajornartorsiutaannaat eqqartorneqanngimmata. Aammali nalilersorneqassapput pitsanngorsaatisaatut siunnersuutit tigussaasut aammali qulaajarneqassallutik, taakku Namminersorlutik Oqartussanut, kommuninut aammalu sullissisunut allanut aningaasatigut allaffissornikkullu sunik kinguneqassanersut.

Tamanna pisariaqarpoq, utoqqarnut tunngasut kusanartunik siunertalersuinnarluni pitsanngorsarneqarsinnaanngimmata. Inatsisartut akisussaassuseqartumik isummissappata, ilisimasariaqarparput, suliniutit suut pisariaqarnerpaanersut, suut sukkanerpaamik piviusunngortinneqarsinnaanersut, suut inatsisinik allannguineramik pisariaqartitsinersut, aammalu suut siunnersuutit ataasiakkaat aningaasatigut allaffissornikkullu kinguneqartussaansut.

Tamanna tunngaviatigut ileqqorissaanermik tunngassuteqarpoq. Inuiaqatigiit ilisimaneqaatigisussaavaat, qanoq utoqqartatsinnut iliuuseqartarnersugut. Inuit taama annertutigisunik nunatsinnut tunniussisimagunik, naatsorsuutigisariaqarpaat, namminneerlutik ikiorneqarnissaminik pisariaqartitsilerunik, suna tamarmi piareersimassasoq.

² Utoqqaat pillugit oqaaseqartartoq 2025-mi UKIMOORTUMIK NALUNAARUT



Tamanna tunngavigalugu neriuppunga, Naalakkersuisut Inatsisartuniilu partiit tamarmik siunnersuut taperseerumaaraat.

Pisortanut aningaasatigut allaffissornikkullu kingunissai

Nalunaarusiap suliarineranut atasumik aningaasartuuteqassaaq. Taakkuli ilinniagartuup ukiumut akissarsiai 500.000 koruunit qaangissanngikkai ilimagineqarpoq.

Namminersorlutik inuussutissarsiortunut aningaasatigut allaffissornikkullu kingunissai

Nalunaarusiap suliarineqarnerani ilimagineqanngilaq.

Innuttaasunut aningaasatigut allaffissornikkullu kingunissai

Nalunaarusiap suliarineqarnerani ilimagineqanngilaq.